

龍湖叢稿補遺

一冊



龍湖叢稿補遺序

吾師趙冠三先生所著龍湖叢稿劍川周公惺甫為
選錄若干篇其詰嗣礪鋒既付印以公諸同好矣圖
南忝為門下士何能再贅一辭惟是吾師生平撰述
不欲輕以示人茲編所載多有為周公未及見者且
其所刪定僅至民十三而止自民十四迄今又閱二
十年約存有百餘篇圖南竊謂學與年俱進昔東坡
少作雖氣象崢嶸然究不若貶謫後之為尤雄健也
吾師解組以還閉戶潛修手不釋卷暇即瀏覽報章

評論政治得失故其文頗切中時弊而言簡義精復
與徒騁詞華者有別秦璞安稱為知古知今豈虛語
哉圖南讀竟因裒為一冊質之當世君子其亦欣賞
而以余為知言乎民國丁亥春二月門人文山楚圖
南序

龍湖叢稿補遺目錄

論辨類

董江都論

諸葛武侯論

魯肅論

魏徵論

信

陵君竊符救趙論

袁素文論

論治盜之法

論

誠實為治事之本

論相

論大理方言

重農說

說馬

說狐

序跋類

書柳子厚捕蛇者說後

書五人傳後

書說類

上勦匪意見書

上善後會議意見書代

致蒙自

道開鑿仙雲兩湖口函代

致旅叙各商幫函代

端午招友人飲啓

夏歷中秋招友人賞月啓

謝

友人九日招飲啓

贈序類

雲龍李子猷先生七十雙壽序

傳狀類

元室楊夫人傳略代

碑誌類

楊利溥先生墓表

趙學山先生墓表

趙印齋先

生墓表

鄭母趙太宜人墓表代

李母王太夫人

墓表

董坤元公墓誌銘

尹萬亭公墓誌銘

楊

母趙孺人墓表

趙崑山先生墓表

尹錫光先生

墓誌銘

趙韻樓先生墓表代

趙節母楊太孺人

墓表代

雜記類

庚申脫險記

丙寅西行記

紀歡迎會盛況

遊

湧泉寺記

新設蒙自等十三縣聯合中學校記

新置喜洲樂善堂義地記

書某甲事

記手足

記犬

記蛇

箴銘類

亦廬銘

贊頌類

曾鏡清先生像贊

趙印齋先生像贊

李順菴君

遺像贊

尹士卿先生像贊

蒼逸圖書館落成紀

念頌詞代

工商週報發刊祝詞

新滇日報發刊

祝詞

華中大學校慶紀念祝詞

哀祭類

祭董澄農先生文代

祭李節母趙太宜人文代

祭董鼎九先生文代

祭楊母張太恭人文

附駢體文

歐陽曉峰縣長德政序代

尹聘三先生六十雙壽

序南湖觀蓮記

募重修九壇神祠疏
丁丑夏

歷九月為祝捷建醮疏

凡六十四篇

龍湖叢稿補遺目錄終

龍湖叢稿補遺

大理冠三趙甲南

董江都論

劉漢兩大儒董子諸葛是也顧諸葛之才似過董子而董子之學較優諸葛何則諸葛才固堪撥亂然謂其無死禮樂可興王通誠不免輕許故程子論之曰禮樂竊未敢望他若董子者伊呂之耦非漢諸儒所及觀其所對三策明天人之道達性命之原發治教之旨陸贄無其粹韓愈無其精蓋純乎純者也雖諸

葛猶弗能言之况賈晁輩哉脫令得君如諸葛之專
行政如諸葛之久安在不可復唐虞夏商周之盛以
實所云而償所望耶而竟見嫉於公孫宏致使去位
家居不獲展其志成其功良足惜也嗟夫武帝崇儒
而董子生於其時董之幸亦漢之幸而卒若是則唐
虞夏商周之盛其終不可復矣史稱武帝尚文學乃
所擢用者不過趙綰王臧等耳莊助吾邱等耳而與
諸葛並且其學較優如董子者反疏之遠之焉噫武
帝殆葉公流亞歟胡好龍而不好其真也此吾所以

悲其遇而深慨武帝之失人也

諸葛武侯論

東坡蘇氏論武侯譏其仁義詐力雜用蒙謂不然何則劉表之喪武侯說先主攻琮荊州可有而先主不忍夫先主之不忍固明夫仁義者也顧表之二子琦賢而琮不肖當曹操擊琮時琮自度不能禦宜引先主計議乃操甫至新野遂舉州降降操即降賊也降賊之人攻之奚為不可向使武侯說行又豈至為異日孫權所藉口哉其後益州之取張松法正龐統等

佐之武侯未與其謀也縱武侯與其謀而亦不得為
武侯罪蓋劉焉雖帝胄而心懷叵測乘董卓之亂據
有益州非命自朝廷也其乘輿服物僭擬天子尤屬
不臣出其尸而戮之亦未為過先主置而不問焉之
幸也况以璋之闇弱其不足拒魏而抗吳也明矣既
不足拒魏而抗吳其勢不折入於魏即折入於吳折
入於魏而魏益強折入於吳而吳益富彼先主者僅
一成耳一旅耳自救且弗暇遑冀三分吾恐關張無
所用其勇武侯無所用其謀而先主必為魏吳所擒

矣先主擒而漢室亡矣安能復延四十三年之久耶
然則益州之取仁義也非詐力也夫武侯生平無可
訾議所可訾議者祇此二事而已而二事卒不可訾
議武侯殆完人哉蘇氏之論非至論也蒙故不取

魯肅論

嘗觀三國之局成以荊州之資劉備劉備之得荊州
以魯肅之勸劉權論者謂肅忠於蜀漢而矯之者謂
其非忠於蜀漢而實忠於吳余曰肅固非忠於蜀漢
而亦非忠於吳肅蓋知時度勢而順以應之者也何

則魏之強豈吳所能及而孫權之才復遠遜夫曹操
吳不足抗魏明矣既不足抗將終折入於魏而吳奚
以存然求其可抗魏而助吳者微劉備誰與屬備具
梟雄之姿而諸葛闕張輩佐之決非久屈為人用者
顧無所憑藉難以驟興耳肅知時度勢計三國之局
必成而欲順以應之此所以勸權借之也不然備蛟
龍也得雲雨不可制肅詎見不及是而乃反縱之為
吳生一敵焉得謂善為吳謀乎吾故曰肅亦非忠於
吳也嗟夫肅之識遠矣惟諸葛與之同其次則曹操

史載操聞權以荊州資備方作書落筆於地誠以荊
州之借三國之局遂成而操不能統一之也彼周瑜
必力沮之其智殆出庸下哉世以周魯並稱誣矣
魏徵論

今夫有治天下之志者必有治天下之才有治天下
之才者亦必有治天下之德苟無其德則其志不正
其才不純惜乎唐太宗之有志有才而獨以無德貽
譏萬世也夫太宗無德豈太宗之自誤哉抑其臣魏
徵誤之耳何則高祖天下創之太宗至建成但以年

長位居東宮於取天下無尺寸功又喜酒色游畋人心不附使一旦即位必忌太宗疑太宗因而殺太宗無太宗直無唐也然則以建成為皇太子實高祖之誤也獨是高祖誤矣徵豈容再誤時徵為洗馬輔導太子當勸建成以孝友則儲位安矣太宗功雖大然以年則長以德則尊未有不帖然服者况高祖始立太宗以固辭而止其心亦可見矣即使高祖欲立之而勉以秦伯之賢則建成有讓國之美太宗無推及之慙不亦善乎乃計不出此使建成擊賊以立威結